

維摩詰所說大乘經

維摩詰所說大乘經卷上

- 佛國品第一 方便品第二 弟子品第三
菩薩品第四 文殊師利問疾品第五
不思議品第六 觀衆生品第七
佛道品第八 入不二法門品第九
香積佛品第十 菩薩行品第十一
見阿閼佛品第十二 法供養品第十三
囑累品第十四

佛國品第一

如是我聞一時佛在毗耶離菴羅樹園與大比丘衆八千人俱皆阿羅漢諸漏已盡無復煩惱得真自在心善解脫慧善解脫如調慧馬亦如大龍已作所作已辦所辦棄諸重擔逮得己利盡諸有結正知解脫至心自在菩

薩三萬二千衆所知識大智本行皆悉成就
諸佛威神之所建立爲護法城受持正法能
師子吼名聞十方衆人不請友而安之紹隆
三寶能使不絕降伏魔怨制諸外道悉已清
淨永離蓋纏心常安住無礙解脫念定總持

辯才不斷布施持戒忍辱精進禪定智慧方
便願力明智無不具足逮無所得不起法忍
已能隨順轉不退輪善解法相知衆生根蓋
諸大衆得無所畏功德智慧以修其心相好
嚴身色像第一捨諸世間所有飾好名稱高

遠踰於須彌深信堅固猶若金剛於佛法僧
信心不退法寶普照而雨甘露於衆言音微
妙第一深入緣起斷諸邪見有無二邊無復
餘習演法無畏猶師子吼其所講說乃如雷
震無有量已過量集衆法寶如海導師了達

諸法解脫深妙之義善知衆生往來所趣及
心所行近無等等佛自在慧十力無畏十八
不共關閉一切諸惡趣門而生五道以現其
身爲大醫王善療一切衆生煩惱衆病應病
與藥令得服行無量功德皆成就無量佛土

皆嚴淨其見聞者無不蒙益諸有所作亦不
唐捐如是無量百千那由他劫不能盡述浩
翰功德皆悉具足其名曰等觀菩薩不等觀
菩薩等不等觀菩薩定自在王菩薩法自在
王菩薩法相菩薩光相菩薩光嚴菩薩大嚴

菩薩寶積菩薩辯積菩薩寶手菩薩寶印手
菩薩常舉手菩薩常下手菩薩常慘菩薩喜
根菩薩喜王菩薩辯音菩薩虛空藏菩薩執
寶炬菩薩寶勇菩薩寶見菩薩帝網菩薩明
網菩薩無緣觀菩薩慧積菩薩寶勝菩薩天

王菩薩壞魔菩薩電德菩薩自在王菩薩功德相嚴菩薩師子吼菩薩雷音菩薩山相擊音菩薩香象菩薩白香象菩薩常精進菩薩不休息菩薩妙生菩薩華嚴菩薩觀世音菩薩得大勢菩薩梵網菩薩寶杖菩薩無勝菩

薩嚴土菩薩金髻菩薩珠髻菩薩妙勝慧菩薩寶德藏菩薩寶嚴菩薩廣願菩薩寶雄菩薩華德藏菩薩彌勒菩薩文殊師利法王子菩薩如是等三萬二千人復有萬梵天王尸棄等從餘四天下來詣佛所頂禮恭敬而爲

聽法復有萬二千天帝亦從餘四天下來在會坐并餘大威力諸天龍神夜叉乾闥婆阿修羅迦樓羅緊那羅摩睺羅伽等悉來會坐諸比丘比丘尼優婆塞優婆夷俱來會坐彼時佛與無量百千之衆恭敬圍遶而爲說法

譬如須彌山王顯于大海安處衆寶師子之座蔽於一切諸來大衆爾時毗耶離城有長者子名曰寶積與五百長者子俱持七寶蓋造菴羅園來詣佛所頭面禮足右遶七匝各以其蓋共供養佛佛之威神令諸寶蓋合成

一蓋遍覆三千大千世界而此世界廣長之相悉於中現又此三千大千世界諸須彌山雪山目真隣陀山摩訶目真隣陀山香山寶山金山黑山鐵圍山大鐵圍山大海江河川流泉源及日月星辰天宮龍宮夜叉乾闥婆

阿修羅迦樓羅緊那羅摩睺羅伽諸宮四天王宮帝王宮殿以及城邑聚落悉現於寶蓋中又十方諸佛諸佛說法亦現於寶蓋中爾時一切大衆覩佛神力歎未曾有合掌禮佛瞻仰尊顏目不暫捨長者子寶積即於佛前

合掌頂禮右膝著地以偈頌曰

目淨修廣如青蓮 心淨已度諸禪定
久積淨業稱無量 導衆以寂故稽首
既見大聖以神變 普現十方無量土
其中諸佛演說法 於是一切悉見聞

法王法力超羣生 常以法財施一切
能善分別諸法相 於第一義而不動
已於諸法得自在 是故稽首此法王
說法不有亦不無 以因緣故諸法生
無我無造無受者 善惡之業亦不亡

始在佛樹力降魔 得甘露滅覺道成
已無心意無受行 而悉摧伏諸外道
三轉法輪於大千 其輪本來常清淨
天人得道此爲證 三寶於是現世間
以斯妙法濟羣生 一受不退常寂然

度老病死大醫王 當禮法海德無邊
毀譽不動如須彌 於善不善等以慈
心行平等如虛空 孰聞人寶不敬承
今奉世尊此微蓋 於中現我二千界
諸天龍神所居宮 乾闥婆等及夜叉

悉見世間諸所有 十力哀現是變化
衆覩希有皆歎佛 今我稽首三界尊
大聖法王衆所歸 淨心觀佛靡不欣
各見世尊在其前 斯則神力不共法
佛以一音演說法 衆生隨類各得解

皆謂世尊同其語 斯則神力不共法
佛以一音演說法 衆生各各隨所解
普得受行獲其利 斯則神力不共法
佛以一音演說法 或有恐畏或歡喜
或生厭離或斷疑 斯則神力不共法

稽首十力大精進 稽首已得無所畏
稽首住於不共法 稽首一切大導師
稽首能斷衆結縛 稽首已到於彼岸
稽首能度諸世間 稽首永離生死道
悉知衆生來去相 善於諸法得解脫

不著世間如蓮華 常善入於空寂行
達諸法相無罣礙 稽首如空無所依
淨除一切染著因 不可思議勝功德

爾時長者子寶積說此偈已白佛言世尊是
五百長者子皆已發阿耨多羅三藐三菩提

心願聞得佛國土清淨唯願世尊說諸菩薩
淨土之行佛言善哉寶積乃能爲諸菩薩問
於如來淨土之行諦聽諦聽善思念之當爲
汝說淨土之行於是寶積及五百長者子受
教而聽佛言寶積衆生之類是菩薩佛土所

以者何菩薩隨所化衆生而取佛土隨所調
伏衆生而取佛土隨諸衆生應以何國入佛
智慧而取佛土隨諸衆生應以何國起菩薩
根而取佛土所以者何菩薩取於淨國皆爲
饒益諸衆生故譬如有人欲於虛空莊嚴量

度終不能成若欲莊嚴量度佛國者亦復如
是不能成就惟有菩薩達諸法性本無猶如
虛空如是饒益衆生即能成就嚴淨國土寶
積當知直心是菩薩淨土菩薩成佛時不謫
衆生來生其國深心是菩薩淨土菩薩成佛

時具足功德衆生來生其國善行是菩薩淨
土菩薩成佛時修善行衆生來生其國大乘
心是菩薩淨土菩薩成佛時大乘衆生來生
其國布施是菩薩淨土菩薩成佛時一切能
捨衆生來生其國持戒是菩薩淨土菩薩成

佛時行十善道滿願衆生來生其國忍辱是
菩薩淨土菩薩成佛時具三十二相莊嚴之
因正直安忍衆生來生其國精進是菩薩淨
土菩薩成佛時勤修一切功德衆生來生其
國禪定是菩薩淨土菩薩成佛時攝心不亂

衆生來生其國智慧是菩薩淨土菩薩成佛
時正定衆生來生其國四無量心是菩薩淨
土菩薩成佛時成就慈悲喜捨衆生來生其
國四攝法是菩薩淨土菩薩成佛時解脫所
攝衆生來生其國方便是菩薩淨土菩薩成

佛時於一切法方便無礙衆生來生其國三
十七道品是菩薩淨土菩薩成佛時念處正
勤神足根力覺道衆生來生其國迴向心是
菩薩淨土菩薩成佛時得一切具足功德國
土說除八難是菩薩淨土菩薩成佛時國土

無有三惡八難自守戒行不譏彼闕是菩薩
淨土菩薩成佛時國土無有犯禁之名十善
是菩薩淨土菩薩成佛時命不中天大富梵
行所言誠諦常以軟語眷屬不離善和諍訟
言必饒益不嫉不恚正見衆生來生其國如

是寶積菩薩隨大乘心則能直心隨其直心
則能發行隨其發行則得深心隨其深心則
意調伏隨意調伏則如說行隨如說行則能
迴向隨其迴向則有方便隨其方便則成就
衆生隨成就衆生則佛土淨隨佛土淨則說

法淨隨說法淨則智慧淨隨智慧淨則其心
淨隨其心淨則一切功德淨是故寶積若菩
薩欲得淨土當淨其心隨其心淨則佛土淨
爾時舍利弗承佛威神作是念若菩薩心淨
則佛土淨者我世尊本爲菩薩時意豈不淨

而是佛土不淨若此佛知其念即告之言於
意云何日月豈不淨耶而盲者不見對曰不
也世尊是盲者過非日月咎舍利弗衆生罪
故不見如來國土嚴淨非如來咎舍利弗我
此土淨而汝不見爾時螺髻梵王語舍利弗

勿作是念謂此佛土以爲不淨所以者何我
見釋迦牟尼佛土清淨譬如自在天宮舍利
弗言我見此土丘陵坑坎荆棘沙礫土石諸
山穢惡充滿螺髻梵王言仁者心有高下不
依佛慧故見此土爲不淨耳舍利弗菩薩於

一切衆生悉皆平等深心清淨依佛智慧則
能見此佛土清淨於是佛以足指按地即時
三千大千世界若干百千珍寶嚴飾譬如寶
莊嚴佛無量功德寶莊嚴土一切大衆歎未
曾有而皆自見坐寶蓮華佛告舍利弗汝且

觀是佛土嚴淨舍利弗言唯然世尊本所不見本所不聞今佛國土嚴淨悉現佛告舍利弗我佛國土常淨若此爲欲度斯下劣人故示是衆惡不淨土耳譬如諸天共寶噐食隨其福德飯色有異如是舍利弗隨衆生所修

清淨心量見佛國功德莊嚴各異當佛現此國土嚴淨之時寶積所將五百長者子皆得無生法忍八萬四千人皆發阿耨多羅三藐三菩提心佛攝神足於是世界還復如故求聲聞乘者三萬二千諸天及人知有爲法皆

悉無常遠塵離垢得法眼淨八千比丘不受諸法漏盡意解

方便品第二

爾時毗耶離大城中有長者名維摩詰已曾供養無量諸佛深殖善本得無生忍辯才無

礙遊戲神通逮諸總持獲無所畏降魔勞怨
入深法門善於智度通達方便大願成就明
了衆生心之所趣又能分別諸根利鈍久於
佛道心已純淑決定大乘諸有所作能善思
量住佛威儀心大如海諸佛咨嗟弟子釋梵

世主所敬欲度人故以善方便居毗耶離資
財無量攝諸貧民奉戒清淨攝諸毀禁以忍
調行攝諸恚怒以大精進攝諸懈怠一心禪
寂攝諸亂意以決定慧攝諸無智雖爲白衣
奉持沙門清淨律行雖處居家不著三界示

有妻子常修梵行現有眷屬常樂遠離雖服
寶飾而以相好嚴身雖復飲食而以禪悅爲
味若至博弈戲處輒以度人受諸異道不毀
正信雖明世典常樂佛法一切見敬爲供養
中最執持正法攝諸長幼一切治生諧偶雖

獲俗利不以喜悅遊諸四衢饒益衆生入治
正法救護一切入講論處導以大乘入諸學
堂誘開童蒙入諸婬舍示欲之過入諸酒肆
能立其志若在長者長者中尊爲說勝法若
在居士居士中尊斷其貪著若在刹利刹利

中尊教以忍辱若在婆羅門婆羅門中尊除
其我慢若在大臣大臣中尊教以正法若在
王子王子中尊示以忠孝若在內官內官中
尊化正宮女若在庶民庶民中尊令興福力
若在梵天梵天中尊誨以勝慧若在帝釋帝

釋中尊示現無常若在護世護世中尊護諸
衆生長者維摩詰以如是等無量方便饒益
衆生其以方便現身有疾以其疾故國王大
臣長者居士婆羅門等及諸王子并餘官屬
無數千人皆往問疾其往者維摩詰因以四

大違和身體廣爲說法諸仁者是身無常無
強無力無堅速朽之法不可信也爲苦爲惱
衆病所集諸仁者如此身明智者所不怙是
身如聚沫不可撮摩是身如泡不得久立是
身如焰從渴愛生是身如芭蕉中無有堅是

身如汲水輪筋骨虛妄聯絡是身如幻從顛
倒起是身如夢爲虛妄見是身如影從業緣
現是身如響屬諸因緣是身如浮雲須臾變
滅是身如電念念不住是身無主爲如地是
身無我爲如火是身無壽爲如風是身無人

爲如水是身不實四大爲家是身爲空離我
我所是身無知如草木瓦礫是身無作風力
所轉是身不淨穢惡充滿是身爲虛僞雖假
以澡浴衣食必歸磨滅是身如災具四百四
病所集是身如丘井爲老所逼是身無定爲

要當死是身如毒蛇如怨賊如空聚陰界諸
入所共合成諸仁者此可患馱當樂佛身所
以者何佛身者即法身也從無量功德智慧
生從布施戒定慧解脫解脫知見生從慈悲
喜捨生從布施持戒善業忍辱柔和勤行精

進禪定解脫等修三昧多聞智慧諸波羅蜜
生從方便生從六通生從三明生從三十七
道品生從止觀生從十力四無所畏十八不
共法生從斷一切不善法集一切善法生從
真實生從不放逸生從如是無量清淨法生

如來身諸仁者欲得佛身斷一切衆生病者
當發阿耨多羅三藐三菩提心如是長者維
摩詰爲諸問疾者如應說法令無數千人皆
發阿耨多羅三藐三菩提心

弟子品第三

爾時長者維摩詰自念寢疾於牀世尊大慈
寧不垂愍遣人慰問耶佛知其意即告舍利
弗汝行詣維摩詰問疾舍利弗白佛言世尊
我不堪任詣彼問疾所以者何憶念我昔曾
於林中宴坐樹下時維摩詰來謂我言唯舍

利弗不必是坐爲宴坐也夫宴坐者不於三
界現身意是爲宴坐不起滅定而現諸威儀
是爲宴坐不捨道法而現凡夫事是爲宴坐
心不住內亦不在外是爲宴坐於諸見不動
而修行三十七品是爲宴坐不斷煩惱而入

涅槃是爲宴坐若能如是坐者佛所印可時
我世尊聞說是語默然而止不能加報故我
不任詣彼問疾佛告大目犍連汝行詣維摩
詰問疾目連白佛言世尊我不堪任詣彼問
疾所以者何憶念我昔入毗耶離大城於里

巷中爲諸居士說法時維摩詰來謂我言唯
大目連爲白衣居士說法不當如仁者所說
夫說法者當如法說法無衆生離衆生垢故
法無有我離我垢故法無壽命離生死故法
無有人前後際斷故法常寂然滅諸相故法

離於相無所緣故法無名字言語斷故法無
有說離覺觀故法無形相如虛空故法無戲
論畢竟空故法無我所離我所故法無分別
離諸識故法無有比無相待故法不屬因不
在緣故法同法性入諸法故法隨於如無所

隨故法住實際諸邊不動故法無動搖不依
六塵故法無去來常不住故法順空隨無相
應無作法離好醜法無增損法無生滅法無
所歸法過眼耳鼻舌身心法無高下法常住
不動法離一切觀行唯大目連法相如是豈

可說乎夫說法者無說無示其聽法者無聞
無得譬如幻士爲幻人說法當建是意而爲
說法當了衆生根有利鈍善於知見無所罣
礙以大悲心讚於大乘念報佛恩不斷三寶
然後說法維摩詰說是法時八百居士發阿

耨多羅三藐三菩提心我無此辯是故不任
詣彼問疾佛告大迦葉汝行詣維摩詰問疾
迦葉白佛言世尊我不堪任詣彼問疾所以
者何憶念我昔於貧里而行乞時維摩詰來
謂我言唯大迦葉有慈悲心而不能普捨豪

富從貧乞迦葉住平等法應次行乞食爲不
食故應行乞食爲壞和合相故應取搏食爲
不受故應受彼食以空聚想入於聚落所見
色與盲等所聞聲與響等所嗅香與風等所
食味不分別受諸觸如智證知諸法如幻相

無自性無他性本自不然今則無滅迦葉若能不捨八邪入八解脫以邪相入正法以一食施一切供養諸佛及衆賢聖然後可食如是食者非有煩惱非離煩惱非入定意非起定意非住世間非住涅槃其有施者無大福

無小福不爲益不爲損是爲正入佛道不依聲聞迦葉若如是食爲不空食人之施也時我世尊聞說是語得未曾有即於一切菩薩深起敬心復作是念斯有家名辯才智慧乃能如是其誰不發阿耨多羅三藐三菩提心

我從是來不復勸人以聲聞辟支佛行是故不任詣彼問疾佛告須菩提汝行詣維摩詰問疾須菩提白佛言世尊我不堪任詣彼問疾所以者何憶念我昔入其舍從乞食時維摩詰取我鉢盛滿飯謂我言唯須菩提若能

於食等者諸佛性亦等諸佛性等者於食亦
等如是行乞乃可取食若須菩提不斷婬怒
癡亦不與俱不壞於身而隨一相不滅癡愛
起於解脫以五逆相而得解脫亦不解不縛
不見四諦非不見諦非得果非不得果非凡

夫非離凡夫法非聖人非不聖人雖成就一
切法而離諸法相乃可取食若須菩提不見
佛不聞法不敬僧彼外道六師富蘭那迦葉
末伽梨拘賒梨子刪闍夜毗羅胝子阿耆多
翅舍欽婆羅迦羅鳩馱迦旃延尼捷陀若提

子等是汝之師因其出家彼師所墮汝亦隨
墮乃可取食若須菩提入諸邪見不到彼岸
住於八難不得無難同於煩惱離清淨法汝
得無諍三昧一切衆生亦得是定其施汝者
不名福田供養汝者墮三惡道爲與衆魔共

一手作諸勞侶汝與衆魔及諸塵勞等無有異於一切衆生而有怨心謗諸佛毀於法不入衆數終不得滅度汝若如是乃可取食時我世尊聞此茫然不識是何言不知以何答便置鉢欲出其舍維摩詰言唯須善提取鉢

勿懼於意云何如來所作化人若以是事詰寧有懼不我言不也維摩詰言一切諸法如幻化相汝今不應有所懼也所以者何一切言說不離是相至於智者不著文字故無所懼何以故文字性離無有文字是則解脫解

脫相者則諸法也維摩詰說是法時二百天子得法眼淨五百天子皆獲法忍故我不任詣彼問疾佛告富樓那彌多羅尼子汝行詣維摩詰問疾富樓那白佛言世尊我不堪任詣彼問疾所以者何憶念我昔於大林中在

一樹下爲諸新學比丘說法時維摩詰來謂我言唯富樓那先當入定觀此人心然後說法無以穢食置於寶器當知是比丘心之所念無以琉璃同彼水精汝不能知衆生根源無得發起以小乘法彼自無瘡勿傷之也欲

行大道莫示小徑無以大海內於牛跡無以日光等彼螢火無以須彌內於芥子無以獅吼誨之狐鳴富樓那此比丘久發大乘心中忘此意如何以小乘法而教導之我觀小乘智慧微淺猶如盲人不能分別一切衆生根

之利鈍時維摩詰即入三昧令此比丘自識宿命曾於五百佛所殖衆德本迴向阿耨多羅三藐三菩提即時豁然還得本心於是諸比丘稽首禮維摩詰足時維摩詰因爲說法於阿耨多羅三藐三菩提不復退轉我念聲

聞不觀人根不應說法所以者何聲聞不能
如如來安住法性常處清淨亦復不能分別
衆生根器利鈍故是故不任詣彼問疾佛告
摩訶迦旃延汝行詣維摩詰問疾迦旃延白
佛言世尊我不堪任詣彼問疾所以者何憶

念昔者佛爲諸比丘略說法要我即於後敷
演其義謂無常義苦義空義無我義寂滅義
時維摩詰來謂我言唯迦旃延無以生滅心
行說實相法迦旃延諸法畢竟三世不生不
滅是無常義五受陰洞達空無所起是苦義

諸法究竟無所有是空義於我無我而不二
是無我義法本不然自他俱空今則無滅是
寂滅義說是法時彼諸比丘心得解脫故我
不任詣彼問疾佛告阿那律汝行詣維摩詰
問疾阿那律白佛言世尊我不堪任詣彼問

疾所以者何憶念我昔於一處經行時有梵王名曰嚴淨與萬梵俱放淨光明來詣我所稽首作禮問我言幾何阿那律天眼所見我即答言仁者吾見此釋迦牟尼佛土三千大千世界如觀掌中菴摩勒果時維摩詰來謂

我言唯阿那律天眼所見爲作相耶無作相耶假使作相則與外道五通等若無作相即是無爲不應有見世尊我時默然彼諸梵聞其言得未曾有即爲作禮而問曰世孰有真天眼者維摩詰言有佛世尊得真天眼常在

三昧悉見諸佛國不以二相於是嚴淨梵王及其眷屬五百梵天皆發阿耨多羅三藐三菩提心禮維摩詰足已忽然不現故我不任詣彼問疾佛告優波離汝行詣維摩詰問疾優波離白佛言世尊我不堪任詣彼問疾所

以者何憶念昔者有二比丘犯律行以爲恥
不敢問佛來問我言唯優波離我等犯律誠
以爲恥不敢問佛願解疑悔得免斯咎我即
爲其如法解說時維摩詰來謂我言唯優波
離無重增此二比丘罪當直除滅勿擾其心

所以者何彼罪性不在內不在外不在中間
如佛所說心垢故衆生垢心淨故衆生淨心
亦不在內不在外不在中間如其心然罪垢
亦然諸法亦然不出於如如優波離以心相
得解脫時寧有垢不我言不也維摩詰言一

切衆生心相無垢亦復如是唯優波離妄想
是垢無妄想是淨顛倒是垢無顛倒是淨取
我是垢不取我是淨優波離一切法生滅不
住如幻如電諸法不相待乃至一念不住諸
法皆妄見如夢如燄如水中月如鏡中像以

妄想知此者是名奉律其知此者是名善解
於是二比丘言上智哉是優波離所不能及
持律之上而不能說我答言爾輩勿泛視維
摩詰也何以故自捨如來未有聲聞及菩薩
能制其樂說之辯其智慧明達爲若此也時

二比丘疑悔即除發阿耨多羅三藐三菩提
心作是願言令一切衆生皆得是辯故我不
任詣彼問疾佛告羅睺羅汝行詣維摩詰問
疾羅睺羅白佛言世尊我不堪任詣彼問疾
所以者何憶念昔時離匹耶離諸長者子

來詣我所稽首作禮問我言唯羅睺羅汝佛
之子捨轉輪王位出家爲道其出家者有何
等利我即如法爲說出家功德之利時維摩
詰來謂我言唯羅睺羅不應說出家功德之
利所以者何無利無功德是爲出家有爲法

者可說有利有功德夫出家者爲無爲法無
爲法中無利無功德羅睺羅夫出家者無彼
無此亦無中間離六十二見處於涅槃智者
所受聖所行處降伏衆魔度五道淨五眼得
五力立五根不惱於彼離衆雜惡摧諸外道

超越假名出淤泥無繫著無我所無所受無
擾亂內懷喜護彼意隨禪定離衆過若能如
是是真出家於是維摩詰語諸長者子汝等
於正法中宜共出家所以者何無難難逢人
身難得佛世難值諸長者子言居士我聞佛

言父母不聽不得出家維摩詰言然汝等便
發阿耨多羅三藐三菩提心是即出家是即
具足爾時三十二長者子皆發阿耨多羅三
藐三菩提心故我不任詣彼問疾佛告阿難
汝行詣維摩詰問疾阿難白佛言世尊我不

堪任詣彼問疾所以者何憶念昔時世尊身
小有疾當用牛乳我即持鉢詣大婆羅門家
門下立時維摩詰來謂我言唯阿難何爲晨
朝持鉢住此我言居士世尊身小有疾當用
牛乳故來至此維摩詰言止止阿難莫作是

語如來身者金剛之體諸惡已斷衆善普會
當有何疾當有何惱默往阿難勿謗如來莫
使異人聞此麤言無令大威德諸天及他方
淨土諸來菩薩得聞斯語阿難轉輪聖王以
少福故尚得無病豈況如來無量福會普勝

者哉行矣阿難勿使我等受斯恥也四種外
道梵志若聞此語當作是念何名爲師自疾
不能救而能救諸疾人可蜜速去勿使人聞
當知阿難諸如來身即是法身非依食身非
思欲身佛爲世尊過於三界佛身無漏諸漏

已盡佛身無爲不墮諸數如此之身當有何疾時我世尊實懷慚愧得無近佛而謬聽耶即聞空中聲曰阿難如居士言但爲佛出五濁惡世現行斯法度脫衆生行矣阿難取乳勿慚世尊維摩詰智慧辯才爲若此也是故

不任詣彼問疾如是五百大弟子各各向佛說其本緣稱述維摩詰所言皆曰不任詣彼問疾

菩薩品第四

於是佛告彌勒菩薩汝行詣維摩詰問疾彌勒白佛言世尊我不堪任詣彼問疾所以者

何憶念我昔爲兜率天王及其眷屬說不退轉地之行時維摩詰來謂我言彌勒世尊授仁者記一生當得阿耨多羅三藐三菩提爲用何生得受記乎過去耶未來耶現在耶若過去生過去生已滅若未來生未來生未至

若現在生現在生無住如佛所說比丘汝今

即時亦生亦老亦變亦滅亦遊若以無生得
受記者無生即是正位於正位申亦無受記
亦無得阿耨多羅三藐三菩提云何彌勒受
一生記乎爲從如生得受記耶爲從如滅得

受記耶若以如生得受記者如無有生若以
如滅得受記者如無有滅一切衆生皆如也
一切法亦如也衆聖賢亦如也至於彌勒亦
如也若彌勒得受記者一切衆生亦應受記
所以者何夫如者不二不異若彌勒得阿耨

多羅三藐三菩提者一切衆生皆亦應得所
以者何一切衆生即菩提相若彌勒得滅度
者一切衆生亦應滅度所以者何諸佛本來
寂滅不復更滅爲度一切衆生故現涅槃相
是故彌勒無以此法誤誘諸天子實無發阿

耨多羅三藐三菩提心者亦無退者彌勒當
令此諸天子捨於執著分別菩提之見所以
者何菩提者不可以身得不可以心得寂滅
是菩提滅諸相故不觀是菩提離諸緣故不
行是菩提無憶念故斷是菩提捨諸見故離

是菩提離諸妄想故障是菩提障諸願故不
入是菩提無貪著故順是菩提順於如故住
是菩提住法性故至是菩提至實際故不二
是菩提離意法故等是菩提等虛空故無爲
是菩提無生住滅故知是菩提了衆生心行

故不會是菩提諸入不會故不合是菩提離
煩惱習故無處是菩提無形色故無住市菩
提不離真如亦不住故假名是菩提名字空
故如化是菩提無取捨故無亂是菩提常自
靜故善寂是菩提性清淨故無取是菩提離

攀緣故無異是菩提諸法性等故無比是菩提無可喻故微妙是菩提諸法難知故空性是菩提普徧諸法故是以菩提不可以身得不可以心得所以者何身如草如木如壁如路如影故心無相無記無倚無見故世尊維

摩詰說是法時二百天子得無生法忍故我不任詣彼問疾佛告光嚴童子汝行詣維摩詰問疾光嚴白佛言世尊我不堪任詣彼問疾所以者何憶念我昔出毗耶離大城時維摩詰方入城爲我作禮我即問言居士從何

所來答我言吾從道場來我問道場者何所是答曰直心是道場無虛假故發行是道場能辦事故深心是道場增益功德故菩提心是道場無錯謬故布施是道場不望報故持戒是道場得願具故忍辱是道場於諸衆生

心無礙故精進是道場不懈怠故禪定是道場
心調柔故智慧是道場現見諸法故慈是道場
等衆生故悲是道場忍疲苦故喜是道場
悅樂法故捨是道場憎愛斷故神通是道場
成就六通故解脫是道場能背捨執著故

方便是道場教化衆生故四攝是道場攝衆
生故多聞是道場如聞行故伏心是道場正
觀諸法故三十七品是道場捨諸有爲無爲
法故四諦是道場不誑世間故緣起是道場
無明乃至老死皆盡故離諸煩惱是道場知

如實故衆生是道場知無我故一切法是道
場知諸法空故降魔是道場不傾動故三界
是道場無所趣故師子吼是道場無所畏故
力無畏不共法是道場無諸過故三明是道
場無餘礙故一念知一切法是道場成就一

切智故如是善男子菩薩若應諸波羅蜜教化衆生諸有所作舉足下足當知皆從道場來住於佛法矣說是法時五百天人皆發阿耨多羅三藐三菩提心故我不任詣彼問疾佛告持世菩薩汝行詣維摩詰問疾持世白

佛言世尊我不堪任詣彼問疾所以者何憶念我昔住於靜室時魔波旬從萬二千天女狀如帝釋鼓樂絃歌來詣我所與其眷屬稽首我足合掌恭敬於一面立我意謂是帝釋而語之言善來憍尸迦雖福應有不當自恣

當觀五欲無常以求善本於身命財而脩堅法即語我言正士受是萬二千天女可備掃灑我言憍尸迦無以此非法之物要我沙門釋子此非我宜所言未訖時維摩詰來謂我言非帝釋也是爲魔來嬈固汝耳即語魔言

是諸女等可以與我如我應受魔即驚懼念
維摩詰將無惱我欲隱形去而不能隱盡其
神力亦不得去即聞空中聲曰波旬以女與
之乃可得去魔以畏故俛仰而與爾時維摩
詰語諸女言魔以汝等與我今汝皆當發阿

耨多羅三藐三菩提心即隨所應而爲說法
令發道意復言汝等已發道意有法樂可以
自娛不應復樂五欲樂也天女即問何謂法
樂答言樂常信佛樂欲聽法樂供養衆樂謙
下禮賢樂超脫三界樂離五欲樂觀五陰如

怨賊樂觀四大如毒蛇樂觀內入如空聚樂
隨護道意樂饒益衆生樂敬養師樂廣行施
樂堅持戒樂忍辱柔和樂勤集善根樂禪定
不亂樂離垢明慧樂廣菩提心樂降伏衆魔
樂斷諸煩惱樂淨佛國土樂成就相好故修

諸功德樂莊嚴道場樂聞深法不畏樂三脫
門不樂非時涅槃樂近同學樂於非同學中
心無恚礙樂將護惡知識樂親近善知識樂
心喜清淨樂以方便引導衆生樂修無量道
品之法是爲菩薩法樂於是波旬告諸女言

我欲與汝俱還天宮諸女言以我等與此居
士有法樂我等甚樂不復樂五欲樂也魔言
居士可捨此女一切所有施於彼者是爲菩
薩維摩詰言我已捨矣汝便將去令一切衆
生得法願具足於是諸女問維摩詰我等云

何止於魔宮維摩詰言諸姊有法門名無盡
燈汝等當學無盡燈者譬如一燈然百千燈
冥者皆明明終不盡如是諸姊夫一菩薩開
導百千衆生令發阿耨多羅三藐三菩提心
於其道意亦不減盡隨所說法而自增益一

切善法名無盡燈也汝等雖住魔宮以是無盡燈令無數天子天女發阿耨多羅三藐三菩提心者爲報佛恩亦大饒益一切衆生爾時天女頭面禮維摩詰足隨魔還宮忽然不現世尊維摩詰有如是自在神力智慧辯

才故我不任詣彼問疾佛告長者子善德汝行詣維摩詰問疾善德白佛言世尊我不堪任詣彼問疾所以者何憶念我昔自於父舍設大施會供養一切沙門婆羅門及諸外道貧窮下賤孤獨乞人期滿七日時維摩詰來

入會中謂我言長者子夫大施會不當如汝所設當爲法施之會何用是財施會爲我言居士何謂法施之會法施會者無前無後一時供養一切衆生是名法施之會曰何謂也謂以菩提起於慈心以救衆生起大悲心以

持正法起於喜心以攝智慧行於捨心以攝
慳貪起檀波羅蜜以化犯戒起尸羅波羅蜜
以無我法起羸提波羅蜜以菩提相起毗梨
耶波羅蜜以離身心相起禪波羅蜜以一切
智起般若波羅蜜教化衆生而起於空不捨

有爲法而起無相示相受生而起無願護持
正法起方便力以度衆生起四攝法以敬事
一切起除慢法於身命財起三堅法於六念
中起思念法於六和敬起質直心正行善法
起於淨命心淨歡喜起近賢聖不憎惡人起

調伏心以出家法起於深心以如說行起於
多聞以無諍法起空閑處趣向佛慧起於宴
坐解衆生縛起修行地以具相好及淨佛土
起福德業知一切衆生心念如應說法起於
智業知一切法不取不捨入一相門起於慧

業斷一切煩惱一切障礙一切不善法起一切善業以得一切智慧一切善法起於一切助佛道法如是善男子是爲法施之會若菩薩住是法施會者爲大施主亦爲一切世間福田世尊維摩詰說是法時婆羅門衆中二

百人皆發阿耨多羅三藐三菩提心我時心得清淨歎未曾有稽首禮維摩詰足即解瓔珞價直百千以上之不肯取我言居士願必納受隨意所與維摩詰乃受瓔珞分作二分持一分施此會中一最下乞人持一分奉彼

難勝如來一切衆會皆見光明國土難勝如來又見珠瓔在彼佛上變成四柱寶臺四面嚴飾不相障蔽時維摩詰現神變已又作是言若施主等心施一最下乞人猶如如來福田之相無所分別等於大悲不求果報是則

名曰具足法施城中一最下乞人見是神力
聞其所說皆發阿耨多羅三藐三菩提心故
我不任詣彼問疾如是諸菩薩各各向佛說
其本緣稱述維摩詰所言皆曰不任詣彼問疾
維摩詰所說大乘經卷上

維摩詰所說大乘經卷中

佛國品第一 方便品第二 弟子品第三

菩薩品第四 文殊師利問疾品第五

不思議品第六 觀衆生品第七

佛道品第八 入不二法門品第九

香積佛品第十 菩薩行品第十一

見阿閼佛品第十二 法供養品第十三

囑累品第十四

文殊師利問疾品第五

爾時佛告文殊師利汝行詣維摩詰問疾文

殊師利白佛言世尊彼上人者心意深妙深

達實相善說法要通達真俗辯才無滯智慧
無礙悲憫慈視一切衆生一切菩薩萬行悉
知諸佛秘藏無不得入降伏衆魔遊戲神通
其慧方便皆已得度已獲甚深不二法性種
種演說一真實相了達一切衆生根器隨示

方便度脫衆生以如是故難爲酬對雖然當
承佛聖旨詣彼問疾於是衆中諸菩薩大弟
子釋梵四天王咸作是念今二大士文殊師
利維摩詰共談必說妙法即時八千菩薩五
百聲聞百千天子天女皆欲隨從於是文殊

師利與諸菩薩大弟子衆及諸天人恭敬圍
遶入毘耶離大城爾時長者維摩詰心念今
文殊師利與大衆俱來即以神力空其室內
除去所有及諸侍者唯置一牀以疾而卧文
殊師利既入其舍見其室空無諸所有獨寢

一床時維摩詰言善來文殊師利不來相而
來不見相而見文殊師利言如是居士若來
已更不來若去已更不去所以者何來者無
所從來去者無所至所可見者更不可見且
置是事居士是疾寧可忍不療治有損不至

增乎世尊殷懃致問無量居士是疾何所因
起其生久如當云何滅維摩詰言從癡有愛
則我病生以一切衆生病是故我病若一切
衆生得不病者則我病滅所以者何菩薩爲
衆生故入生死有生死則有病若衆生得離

病者則菩薩無復病譬如長者唯有一子其
子得病父母亦病若子病愈父母亦愈菩薩
如是於諸衆生愛之若子衆生病則菩薩病
衆生病愈菩薩亦愈又言是疾何所因起菩
薩疾者以大悲起文殊師利言居士此室何

以空無侍者維摩詰言諸佛國土亦復皆空
又問以何爲空答曰以空空又問空何用空
答曰以無分別空故空又問空可分別耶答
曰分別亦空空不解空又問空當於何求答
曰當於六十二見中求又問六十二見當於

何求答曰當於諸佛解脫中求又問諸佛解
脫當於何求答曰當於一切衆生心行中求
又仁所問何無侍者一切衆魔及諸外道皆
吾侍也所以者何衆魔者樂生死菩薩於生
死而不捨外道者樂諸見菩薩於諸見而不

動文殊師利言居士所疾爲何等相維摩詰
言我病無形不可見又問此病身合耶心合
耶答曰非身合身相離故亦非心合心如幻
故又問地大水大火大風大於此四大何大
之病答曰是病非地大亦不離地大水火風

大亦復如是而衆生病從四大起以其有病
是故我病爾時文殊師利問維摩詰言菩薩
應云何慰喻有疾菩薩維摩詰言說身無常
不說厭離於身說身有苦不說樂於涅槃說
身無我不說不導衆生說身空寂不說畢竟

寂滅說悔先罪而不說入於過去以己之疾
愍於彼疾當識宿世無數劫苦當念饒益一
切衆生憶所修福念於淨命勿生憂惱常起
精進當作醫王療治衆病菩薩應如是慰喻
有疾菩薩令其歡喜文殊師利言居士有疾

菩薩云何調伏其心維摩詰言有疾菩薩應
作是念今我此病皆從前世妄想顛倒諸煩
惱生無有實法誰受病者所以者何四大合
故假名爲身四大無主身亦無我又此病起
皆由著我是故於我不應生著既知病本即

除我想及衆生想當起法想應作是念但以衆法合成此身起唯法起滅唯法滅又此法者各不相知起時不言我起滅時不言我滅彼有疾菩薩爲滅法想當作是念此法想者亦是顛倒顛倒者即是大患我應離之云何

爲離離我我所云何離我我所謂離二法云何離二法謂不念內外諸法云何不念內外諸法謂遠離動淆散亂行於平等云何平等爲我等涅槃等所以者何我及涅槃此二皆空以何爲空但以名字故空如此二法無決

定性得是平等無有餘病唯有空病空病亦空是有疾菩薩以無所受而受諸受未具佛法亦不滅受而取證也設身有苦念惡趣衆生起大悲心我既調伏亦當調伏一切衆生但除其病而不除法爲斷病本而教導之何

謂病本謂有攀緣從有攀緣則爲病本何所
攀緣謂之三界云何斷攀緣以無所得若無
所得則無攀緣何謂無所得謂離二見何謂
二見謂內見外見是無所得文殊師利是爲
有疾菩薩調伏其心爲斷老病死苦是菩薩

菩提若不如是已所修治爲無惠利譬如勝
怨乃可爲勇如是兼除老病死者菩薩之謂
也彼有疾菩薩應復作是念如我此病非真
非有衆生病亦非真非有作是觀時於諸衆
生若起愛見大悲即應捨離所以者何菩薩

斷除客塵煩惱而起大悲愛見悲者則於生
死有疲厭心若能離此無有疲厭在在所生
不爲愛見之所覆也所生無縛雖現生死而
實解脫能爲衆生說法解縛如佛所說若自
有縛能解彼縛無有是處若自無縛能解彼

縛斯有是處是故菩薩不應起縛何謂縛何
謂解貪著禪味是菩薩縛以方便生是菩薩
解無方便貪著禪味是菩薩縛有方便深入
禪定是菩薩解無方便生是菩薩縛有方便
生是菩薩解又無方便慧縛有方便慧解無

慧方便縛有慧方便解何謂無方便慧縛謂
菩薩以愛見心勤修相好莊嚴佛土成就衆
生於空無相無作法中而自調伏是名無方
便慧縛何謂有方便慧解謂不以愛見心莊
嚴佛土成就衆生於空無相無作法中以自

調伏而不疲厭是名有方便慧解何謂無慧
方便縛謂菩薩住貪欲瞋恚邪見等諸煩惱
而殖衆德本是名無慧方便縛何謂有慧方
便解謂離諸貪欲瞋恚邪見等諸煩惱而殖
衆德本迴向阿耨多羅三藐三菩提是名有

慧方便解文殊師利彼有疾菩薩應如是觀
諸法復觀身心無常苦空非我是名為慧雖
身有疾常在生死饒益一切而不厭倦是名
方便又復觀身身不離病病不離身是病是
身非新非故是名為慧設身有疾而不永滅

是名方便文殊師利有疾菩薩應如是調伏
其心不住其中亦復不住不調伏心所以者
何若住不調伏心是愚人法若住調伏心是
聲聞法是故菩薩不當住於調伏不調伏心
離此二法是菩薩行在於生死不為汙行住

於涅槃不永滅度是菩薩行非凡夫行非聖
賢行是菩薩行非垢行非淨行是菩薩行雖
過魔行而現降伏眾魔是菩薩行求一切智
無非時求是菩薩行雖觀四諦非時不入真
如是菩薩行雖觀本空為度眾生受生是菩

薩行雖觀諸法不生而不入正位是菩薩行
雖觀十二緣起而入諸邪見是菩薩行雖攝
一切衆生而不愛著是菩薩行雖樂遠離而
不依身心盡是菩薩行雖行三界而不壞法
性是菩薩行雖行於空而殖衆德本是菩薩

行雖行無相而度衆生是菩薩行雖行無作
而現受身是菩薩行雖行無起而起一切善
行是菩薩行雖行六波羅蜜而遍知衆生心
心數法是菩薩行雖行六通而不盡漏是菩
薩行雖常住妙法而不捨諸邪見是菩薩行

雖行四無量心而不貪著生於梵世是菩薩
行雖正觀六念而不除諸漏是菩薩行雖行
禪定解脫三昧而不隨禪生是菩薩行雖行
四念處不畢竟永離身受心法是菩薩行雖
行四正勤而不捨身心精進是菩薩行雖行

四如意足而得自在神通是菩薩行雖行五
根而分別衆生諸根利鈍是菩薩行雖行五
力而樂求佛十力是菩薩行雖行七覺分而
分別佛之智慧是菩薩行雖行八正道而樂
行無量佛道是菩薩行雖行止觀助道之法

而不畢竟墮於寂滅是菩薩行雖行諸法不
生不滅而以相好莊嚴其身是菩薩行雖現
聲聞辟支佛威儀而不捨佛法是菩薩行雖
隨諸法究竟淨相而隨所應爲現其身是菩
薩行雖觀諸佛國土永寂如空而現種種清

淨佛土是菩薩行雖得佛道轉於法輪入於
涅槃而不捨於菩薩之道是菩薩行說是語
時文殊師利所將大衆其中八千天子皆發
阿耨多羅三藐三菩提心

不思議品第六

爾時舍利弗見此室中無有牀座作是念斯諸菩薩大弟子衆當於何坐長者維摩詰知其意語舍利弗言云何仁者爲法來耶求牀座耶舍利弗言我爲法來非爲牀座維摩詰言唯舍利弗夫求法者不貪軀命何況牀座

夫求法者非有色受想行識之求非有界入之求非有欲色無色之求唯舍利弗夫求法者不著佛求不著法求不著衆求夫求法者無見苦求無斷集求無證滅求無修道求所以者何法無戲論若言我當見苦斷集證滅

修道是則戲論非求法也唯舍利弗法名清淨寂滅若行生滅是不樂遠離而求生滅非求法也法名無染無塵若染法塵乃至涅槃是則染著塵勞非求法也法無前境若行於法是則前境非求法也法無取捨若取捨法

是則取捨非求法也法無處所若著處所是則著處非求法也法名無相若隨相識是則求相非求法也法不可住若住於法是則住法非求法也法不可見聞覺知若行見聞覺知是則見聞覺知非求法也法名無爲無無

爲若行有爲無爲是求有爲無爲非求法也是故舍利弗若求法者於一切法應無所求說是語時五百天子於諸法中得法眼淨爾時長者維摩詰問文殊師利仁者遊於無量千萬億阿僧祇國何等佛土有好上妙功德

成就師子之座文殊師利言居士東方度三十六恒河沙國有世界名須彌幢相其佛號須彌燈王今現在彼佛身長八萬四千由旬其師子座高六十八億由旬菩薩身長四萬二千由旬其師子座高三十二億由旬嚴飾

第一於是長者維摩詰現神通力即時彼佛遣三萬二千師子之座高廣嚴淨來入維摩詰室諸菩薩大弟子釋梵四天王等昔所未見其室廣博悉皆包容三萬一千師子座無所妨礙於毗耶離城及閻浮提等四大部洲

亦不迫迮悉見如故爾時維摩詰語文殊師利就師子座與諸菩薩上人俱坐當自立身如彼座像其得神通菩薩即自變形爲四萬二千由旬坐師子座諸新發意菩薩皆不能昇爾時維摩詰爲新發意菩薩宣說五通妙

法即時伊等俱獲五神通力變形爲四萬二千由旬坐師子座諸大弟子亦不能昇爾時維摩詰語舍利弗就師子座舍利弗言居士此座高廣吾不能昇維摩詰言唯舍利弗爲須彌燈王如來作禮乃可得坐於是諸大弟

子即爲須彌燈王如來作禮便得坐師子座
舍利弗言居士未曾有也如是小室乃容受
此高廣之座於毗耶離城無所妨礙又於閻
浮提聚落城邑及四大部洲諸天龍王鬼神
宮殿亦不迫迮維摩詰言唯舍利弗諸佛菩

薩有解脫名不可思議若菩薩住是解脫者
以須彌之高廣內芥子中無所增減須彌山
王本相如故而四天王忉利諸天不覺不知
己之所入唯應度者乃見須彌入芥子中是
名不可思議解脫法門又以四大海水入一

毛孔不燒魚鼈黿鼉水性之屬而彼大海本
性如故諸龍鬼神阿修羅等不覺不知己之
所入於此衆生亦無所燒又舍利弗住不可
思議解脫菩薩斷取三千大千世界如陶家
輪著右掌中擲過恒沙世界之外其中衆生

不覺不知己之所往又復還置本處都不使人有往來想而此世界本相如故又舍利弗或有衆生樂久住世而可度者菩薩即演七日以爲一劫令彼衆生謂之一劫或有衆生不樂久住而可度者菩薩即促一劫以爲七

日令彼衆生謂之七日又舍利弗住不可思議解脫菩薩以一切功德莊嚴諸佛國土集在一國示於衆生又菩薩以一切佛土衆生置之右掌飛到十方遍示一切而不動本處又舍利弗十方衆生供養諸佛之具菩薩於

一毛孔皆令得見又十方國土所有日月星宿於一毛孔普使見之又舍利弗十方世界所有諸風菩薩悉能吸著口中而身無損外諸樹木亦不摧折又十方世界劫盡燒時以一切火內於腹中火事如故而不爲害又於

下方過恒河沙等諸佛世界取一佛土舉著
上方過恒河沙無數世界如持針鋒舉一栢
葉而無所撓又舍利弗住不可思議解脫菩
薩能以神通現作佛身或現辟支佛身或現
聲聞身或現帝釋身或現梵王身或現世主

身或現轉輪聖王身又十方世界所有衆聲
上中下音皆能變之令作佛聲演出無常苦
空無我之音及十方諸佛所說種種之法皆
於其中普令得聞舍利弗我今畧說菩薩不
可思議解脫之力若廣說者窮劫不盡是時

大迦葉聞說菩薩不可思議解脫法門歎未
曾有謂舍利弗譬如有人於盲者前現衆色
像非彼所見一切聲聞辟支聞是不可思議
解脫法門不能解了爲若此也智者聞是其
誰不發阿耨多羅三藐三菩提心一切聲聞

辟支聞是不可思議解脫法門皆言我等何
爲永斷其根於此大乘已如敗種於是衆皆
號泣聲震三千大千世界一切菩薩應大欣
慶頂受此法若有菩薩信解不可思議解脫
法門者一切魔衆無如之何大迦葉說此語

時三萬二千天子皆發阿耨多羅三藐三菩
提心爾時維摩詰語大迦葉仁者十方無量
阿僧祇世界中作魔王者多是住不可思議
解脫菩薩以方便力故教化衆生現作魔王
又迦葉十方無量菩薩或有人從乞手足耳

鼻頭目髓腦血肉皮骨聚落城邑妻子奴婢
象馬車乘金銀琉璃碑磔碼碯珊瑚琥珀真
珠珂貝衣服飲食如此乞者多是住不可思
議解脫菩薩以方便力而往試之令其堅固
所以者何住不可思議解脫菩薩有威德力

故行逼迫示諸衆生如是難事凡夫下劣無有力勢不能如是逼迫菩薩譬如螢火之光難並日月非如是菩薩不能往試菩薩又如龍象蹴踏非驢所堪是名住不可思議解脫菩薩智慧方便力門

觀衆生品第七

爾時文殊師利問維摩詰言菩薩云何觀於衆生維摩詰言譬如幻師見所幻人菩薩觀衆生爲若此如智者見水中月如鏡中見其面像如熱時燄如呼聲響如空中雲如水聚

沫如水上泡如芭蕉堅如電久住如第五大如第六陰如第七識如十三入如十九界菩薩觀衆生爲若此如無色界色如焦穀芽如龜毛衣如枯骨行走如須陀洹身見如斯陀含三來如阿那含入胎如阿羅漢三毒如得

忍菩薩貪恚毀禁殘虐如佛煩惱習如盲者
見色如入滅盡定出入息如空中鳥跡如奄
宦具淫根如石女生兒如化人煩惱如夢所
見已寤如無著而有煩惱如無根而能生物
如滅度者受身如無烟之火菩薩觀衆生爲

若此本無文殊師利言若菩薩作是觀者云
何行慈維摩詰言菩薩作是觀已自念我當
爲衆生說如斯法是即真實無著慈也行寂
滅慈無所生故行不熱慈無煩惱故行等之
慈等三世故行無諍慈無所起故行不二慈

內外不合故行不壞慈畢竟盡故行堅固慈
心無毀故行清淨慈諸法性淨故行無邊慈
如虛空故行阿羅漢慈破劫賊故行菩薩慈
安衆生故行如來慈得如相故行佛之慈覺
衆生故行自然慈無因得故行菩提慈等一

味故行無等慈斷諸愛嗔故行大悲慈導以
大乘故行無厭慈觀空無我故行法施慈無
遺惜故行持戒慈化毀禁故行忍辱慈護彼
我故行精進慈荷負衆生故行禪定慈不受
味故行智慧慈無不知時故行方便慈一切

示現故行無隱慈直心清淨故行深心慈無
雜行故行無誑慈不虛假故行安樂慈令得
佛樂故菩薩之慈爲若此也文殊師利又問
何謂爲悲答曰菩薩所作功德皆與一切衆
生共之何謂爲喜答曰有所饒益歡喜無悔

何謂爲捨答曰所作福祐無所悵望文殊師
利又問生死有畏菩薩當何所依維摩詰言
菩薩於生死畏中當依如來功德之力文殊
師利又問菩薩欲依如來功德之力當於何
住答曰菩薩欲依如來功德力者應當等觀

一切衆生又問欲等觀一切衆生當於何住
答曰菩薩欲等觀一切衆生者當住度脫一
切衆生又問欲度衆生當何所除答曰欲度
衆生除其煩惱又問欲除煩惱當何所行答
曰當行正念又問云何行於正念答曰當行

不生不滅又問何法不生何法不滅答曰不
善不生善法不滅又問善不善孰爲本答曰
身爲本又問身孰爲本答曰欲貪爲本又問
欲貪孰爲本答曰虛妄分別爲本又問虛妄
分別孰爲本答曰顛倒想爲本又問顛倒想

孰爲本答曰無住爲本又問無住孰爲本答
曰無住則無本文殊師利從無住本立一切
法時維摩詰室有一天女見諸天人聞所說
法便現其身即以天華散諸菩薩大弟子上
華至諸菩薩即皆墮落至大弟子便著不墮

一切弟子神力去華不能令去爾時天問舍利弗何故去華答曰此華不如法是以去之天曰勿謂此華爲不如法所以者何是華無所分別仁者自生分別想耳若於佛法出家有所分別爲不如法若無所分別是則如法

觀諸菩薩華不著者已斷一切分別想故譬如人畏時非人得其便如是弟子畏生死故色聲香味觸得其便也已離畏者一切五欲無能爲也結習未盡華著身耳結習盡者華不著也舍利弗言天止此室其已久如答曰

我止此室如耆年解脫舍利弗言止此久耶天曰耆年解脫亦何如久舍利弗默然不答天曰如何耆舊大智而默答曰解脫者無所言說故吾於是不知所云天曰言說文字皆解脫相所以者何解脫者不內不外不在兩

間文字亦不內不外不在兩間是故舍利弗
無離文字說解脫也所以者何一切諸法是
解脫相舍利弗言不復以離婬怒癡爲解脫
乎天曰佛爲增上慢人說離婬怒癡爲解脫
耳若無增上慢者佛說婬怒癡性即是解脫

舍利弗言善哉善哉天女汝何所得以何爲
證辯乃如是天曰我無得無證故辯如是所
以者何若有得有證者即於佛法爲增上慢
舍利弗問天汝於三乘爲何志求天曰以聲
聞法化衆生故我爲聲聞以因緣法化衆生

故我爲辟支佛以大悲法化衆生故我爲大
乘舍利弗如人入瞻蔔林唯嗅瞻蔔不嗅餘
香如是若入此室但聞佛功德之香不樂聞
聲聞辟支佛功德香也舍利弗其有釋梵四
天王諸天龍鬼神等入此室者聞斯上人講

說正法皆樂佛功德之香發心而出舍利弗
吾止此室十有二年初不聞說聲聞辟支佛
法但聞菩薩大慈大悲不可思議諸佛之法
舍利弗此室常現八未曾有難得之法何等
爲八此室常以金色光照晝夜無異不以日

月所照爲明是爲一未曾有難得之法此室
入者不爲諸垢之所惱也是爲二未曾有難
得之法此室常有釋梵四天王他方菩薩來
會不絕是爲三未曾有難得之法此室常說
六波羅蜜不退轉法是爲四不曾有難得之

法此室常作天人第一之樂絃出無量法化
之聲是爲五未曾有難得之法此室有四大
藏衆寶積滿周窮濟乏求得無盡是爲六未
曾有難得之法此室釋迦牟尼佛阿彌陀佛
阿閼佛寶德寶炎寶月寶嚴難勝多寶師子

響一切利成如是等十方無量諸佛是上人
念時即皆爲來廣說諸佛秘要法藏說已還
去是爲七未曾有難得之法此室一切諸天
嚴飾宮殿諸佛淨土皆於中現是爲八未曾
有難得之法舍利弗此室常現人未曾有難

得之法唯有見斯不思議事而復樂於聲聞
法乎舍利弗言汝何以不轉女身天曰我從
十二年來求女人相了不可得當何所轉譬
如幻師化作幻女若有人問何以不轉女身
是人爲正問不舍利弗言不也幻無定相當

何所轉天曰一切諸法亦復如是無有定相
云何乃問不轉女身即時天女以神通力變
舍利弗令如天女天自化身如舍利弗而問
言何以不轉女身舍利弗以天女像而答言
我今不知何轉而變爲女身天曰舍利弗若

能轉此女身則一切女人亦當能轉如舍利弗非女而現女身一切女人亦復如是雖現女身而非女也是故佛說一切諸法非男非女即時天女還攝神力舍利弗身還復如故天問舍利弗女身色相今何所在舍利弗言

女身色相無在無不在天曰一切諸法亦復如是無在無不在夫無在無不在者佛所說也舍利弗問天汝於此没當生何所天曰佛化所生吾如彼生曰佛化所生非没生也天曰衆生猶然無没生也舍利弗問天汝久如

當得阿耨多羅三藐三菩提天曰如舍利弗還爲凡夫我乃當成阿耨多羅三藐三菩提舍利弗言我作凡夫無有是處天曰我得阿耨多羅三藐三菩提亦無是處所以者何菩提無住處是故無有得者舍利弗言今諸佛

得阿耨多羅三藐三菩提已得當得未得如
恒河沙皆謂何乎天曰皆以世俗文字數故
說有三世非謂菩提有去來今天曰舍利弗
汝得阿羅漢道耶曰無所得故而得天曰諸
佛菩薩亦復如是無所得故而得爾時維摩

詰語舍利弗是天女已曾供養九十二億諸
佛已能遊戲菩薩神通所願具足得無生忍
住不退轉以本願故隨意能現教化衆生

佛道品第八

爾時文殊師利問維摩詰言菩薩云何通達

佛道維摩詰言若菩薩行於非道是爲通達
佛道又問云何菩薩行於非道答曰若菩薩
行五無間而無惱恚至於地獄無諸罪垢至
于畜生無有愚癡至於修羅無有憍慢等過
至于餓鬼而具足功德智慧行色無色界道

不以爲勝示行貪欲離諸染著示行瞋恚於
諸衆生無有恚礙示行愚癡而以智慧調伏
其心示行慳貪而捨內外所有不惜身命示
行毀禁而安住淨戒乃至小罪猶懷大懼示
行瞋恚而常慈忍示行懈怠而勤修功德示

行亂意而常念定示行愚癡而修般若波羅
蜜多通達世間出世間慧示行諂僞而善方
便隨諸經義示行憍慢而於衆生猶如橋梁
示行諸煩惱而心常清淨示入於魔而順佛
智慧不隨他教示入聲聞而爲衆生說未聞

法示入辟支佛而成就大悲教化衆生示入
貧窮而有寶手功德無盡示入形殘而具諸
相好以自莊嚴示入下賤而生佛種姓中具
諸功德示入羸劣醜陋而得那羅延身一切
衆生之所樂見示入老病而永斷病根超越

死畏示有資生而恒觀無常實無所貪示入
優伶子女而常遠離五欲淤泥現於訥鈍而
成就辯才總持無失示入邪濟而以正濟度
諸衆生現遍入諸道而斷其因緣現於涅槃
而不斷生死文殊師利菩薩能如是行於非

道是爲通達佛道於是維摩詰問文殊師利
何等爲如來種文殊師利言有身爲種無明
有愛爲種貪恚癡爲種四顛倒爲種五蓋爲
種六入爲種七識處爲種八邪法爲種九惱
處爲種十不善道爲種以要言之六十二見

及一切煩惱皆是佛種曰何謂也答曰若見
無爲入正位者不能復發阿耨多羅三藐三
菩提心住有爲法凡夫可以發阿耨多羅三
藐三菩提心譬如高原陸地不生淨妙馨香
蓮華卑濕淤泥乃生此華如是見無爲法入

正位者終不復能生於佛法煩惱泥中乃有衆生起佛法耳又如植種於空終不得生糞壤之地乃能滋茂如是入無爲正位者不生佛法起於我見如須彌山猶能發于阿耨多羅三藐三菩提心生佛法矣是故當知一切

煩惱爲如來種譬如不下巨海不能得無價寶珠如是不入煩惱大海則不能得一切智寶爾時大迦葉歎言善哉善哉文殊師利快說此語誠如所言塵勞之儔爲如來種我等今者不復堪任發阿耨多羅三藐三菩提心

乃至五無間罪猶能發意生於佛法而今我等永不能發譬如根敗之士其於五欲不能復利如是聲聞諸結斷者於佛法中無所復益永不志願是故文殊師利凡夫知報佛恩而聲聞無也所以者何凡夫聞佛法能起無

上道心不斷三寶正使聲聞終身聞佛法力
無畏等永不能發無上道意爾時會中有菩
薩名普現色身問維摩詰言居士父母妻子
親戚眷屬吏民知識悉爲是誰奴婢僮僕象
馬車乘皆何所在於是維摩詰以偈答曰

智度菩薩母 方便以爲父 一切衆導師
無不由是生 法喜以爲妻 慈悲心爲女
善心誠實男 畢竟空寂舍 弟子衆塵勞
隨意之所轉 道品善知識 由是成正覺
諸度法等侶 四攝爲妓女 歌詠誦法言

以此爲音樂 總持之園苑 無漏法林樹
覺意淨妙華 解脫智慧果 八解之浴池
定水湛然滿 布以七淨華 浴此無垢人
象馬五通馳 大乘以爲車 調御以一心
遊於八正路 相具以嚴容 衆好飾其姿

慚愧之上服 深心爲華鬢 富有七財寶
教授以滋息 如所說修行 迴向爲大利
四禪爲牀座 從於淨命生 多聞增智慧
以爲自覺音 甘露法之食 解脫味爲漿
淨心以澡浴 戒品爲塗香 摧滅煩惱賊

勇健無能踰 降伏四種魔 勝旛建道場
雖知無起滅 示彼故有生 悉現諸國土
如日無不見 供養於十方 無量億如來
諸佛及己身 無有分別想 雖知諸佛國
及與衆生空 而常修淨土 教化於羣生

諸有衆生類 形聲及威儀 無畏力菩薩
一時能盡現 覺知衆魔事 而示隨其行
以善方便智 隨意皆能現 或示老病死
成就諸羣生 了知如幻化 通達無有礙
或現劫盡燒 天地皆洞然 衆人有常想

照令知無常 無數億衆生 俱來請菩薩
一時到其舍 化令向佛道 經書禁呪術
工巧諸技藝 盡現行此事 饒益諸羣生
世間衆道法 悉於中出家 因以解人惑
而不墮邪見 或作日月天 梵王世界主

或時作地水 或復作風火 劫中有疾疫
現作諸藥草 若有服之者 除病消衆毒
劫中有饑饉 現身作飲食 先救彼饑渴
却以法語人 劫中有刀兵 爲之起慈悲
化彼諸衆生 令住無諍地 若有大戰陣

立之以等力 菩薩現威勢 降伏使和安
一切國土中 諸有地獄處 輒往到于彼
勉濟其苦惱 一切國土中 畜生相食噉
皆現生於彼 爲之作利益 示受於五欲
亦復現行禪 令魔心憤亂 不能得其便

火中生蓮華 是可謂希有 在欲而行禪
希有亦如是 或現作姪女 引諸好色者
先以欲鉤牽 後令入佛智 或爲邑中主
或作商人導 師保及大臣 以祐利衆生
諸有貧窮者 現作無盡藏 因以勸導之

令發菩提心 我心憍慢者 爲現大力士
消伏諸貢高 令住無上道 其有恐懼衆
居前而慰安 先施以無畏 後令發道心
或現離姪欲 爲五通仙人 開導諸羣生
令住戒忍慈 見須供事者 現爲作僮僕

既悅可其意 乃發以道心 隨彼之所須
得入於佛道 以善方便力 皆能給足之
如是道無量 所行無有涯 智慧無邊際
度脫無數衆 假令一切佛 於無量億劫
讚歎其功德 猶尚不能盡 誰聞如是法

不發菩提心 除彼不肖人 癡冥無智者
入不二法門品第九

爾時維摩詰謂衆菩薩言諸仁者云何菩薩
入不二法門各隨所樂說之會中有菩薩名
法自在說言諸仁者生滅爲二法本不生今

則無滅得此無生法忍是爲入不二法門德
守菩薩曰我我所爲二因有我故便有所
若無有我則無我所是爲入不二法門德頂
菩薩曰垢淨爲二見垢實性則無淨相順於
滅相是爲入不二法門善宿菩薩曰是動是

念爲二不動則無念無念則無分別通達此
者是爲入不二法門妙臂菩薩曰菩薩心聲
聞心爲二觀心相空如幻化者無菩薩心無
聲聞心是爲入不二法門不眴菩薩曰受不
受爲二若法不受則不可得以不可得故無

取無捨無作無行是爲入不二法門善眼菩薩曰一相無相爲二若知一相即是無相亦不取無相入於平等是爲入不二法門弗沙菩薩曰善不善爲二若不起善不善入無相際而通達者是爲入不二法門師子菩薩曰

罪福爲二若達罪性則與福無異以金剛慧決了此相無縛無解者是爲入不二法門師子意菩薩曰有漏無漏爲二若得諸法等則不起漏不漏想不著於相亦不住無相是爲入不二法門淨解菩薩曰有爲無爲爲二若

離一切數則心如虛空以清淨慧無所礙者是爲入不二法門那羅延菩薩曰世間出世間爲二世間性空即是出世間於其中不入不出不渡不住是爲入不二法門善意菩薩曰生死涅槃爲二若見生死性則無生死無

縛無解不生不滅如是解者是爲入不二法門現見菩薩曰盡不盡爲二法若究竟盡若不盡皆是無盡相無盡相即是空空則無有盡不盡相如是入者是爲入不二法門普守菩薩曰我無我爲二我尚不可得非我何可

得見我實性者不復起二是爲入不二法門電天菩薩曰明無明爲二無明實性即是明明亦不可著離一切數於其中平等無二者是爲入不二法門喜見菩薩曰色色空爲二色即是空非色滅空色性自空如是受想行

識識空爲二識即是空非識滅空識性自空於其中而通達者是爲入不二法門明相菩薩曰四種異空種異爲二四種性即是空種性如前際後際空故中際亦空若能如是知諸種性者是爲入不二法門妙意菩薩曰眼

色爲二若知眼性於色不貪不恚不癡是名寂滅如是耳聲鼻香舌味身觸意法爲二若知意性於法不貪不恚不癡是名寂滅安住其中是爲入不二法門無盡意菩薩曰布施迴向一切智爲二布施性即是迴向一切智

性如是持戒忍辱精進禪定智慧迴向一切智爲二智慧性即是迴向一切智性於其中入一相者是爲入不二法門深慧菩薩曰是空是無相是無作爲二空即無相無相即無作若空無相無作則無心意識於一解脫門

即是三解脫門者是爲入不二法門寂根菩薩曰佛法衆爲二佛即是法法即是衆是三寶皆無爲相與虛空等一切法亦爾能隨此行者是爲入不二法門心無礙菩薩曰身身滅爲二身即是身滅所以者何見身實相者

不起見身及見滅身身與滅身無二無分別
於其中身見滅之又滅盡滅無餘不驚不懼
者是爲入不二法門上善菩薩曰身口意善
爲二是三業皆無作相身無作相即口無作
相口無作相即意無作相是三業無作相即

一切法無作相能如是隨無作慧者是爲入
不二法門福田菩薩曰福行罪行不動行爲
二三行實性即是空空則無福行無罪行無
不動行於此三行而不起者是爲入不二法
門華嚴菩薩曰從我起二爲二見我實相者

不起二法若不住二法則無分別識無分別
識者是爲入不二法門德藏菩薩曰有所得
相爲二若無所得則無取捨無取捨者是爲
入不二法門月上菩薩曰闇與明爲二無闇
無明則無有二所以者何如入滅受想定無

闇無明一切法相亦復如是於其中平等入者是爲入不二法門寶印手菩薩曰樂涅槃不樂世間爲二若不樂涅槃不厭世間則無有二所以者何若有縛則有解若本無縛其誰求解無縛無解則無樂厭是爲入不二法

門珠頂王菩薩曰正道邪道爲二住正道者則不分別是邪是正離此二者是爲入不二法門樂實菩薩曰實不實爲二實見者尚不見實何況非實所以者何非肉眼所見慧眼乃能見而此慧眼無見無不見是爲入不二

法門如是諸菩薩各各說已問文殊師利何等是菩薩入不二法門文殊師利曰諸尊菩薩所對甚善然終有言說如我意者於一切法無言無說無示無識離諸問答是爲入不二法門於是文殊師利問維摩詰我等各自

說已仁者當說何等是菩薩入不二法門時
維摩詰默然無言文殊師利歎曰善哉善哉
乃至無有文字語言是真入不二法門說是
入不二法門品時於此衆中五千菩薩皆入
不二法門得無生法忍
維摩詰所說大乘經卷中

維摩詰所說大乘經卷下

佛國品第一 方便品第二 弟子品第三
菩薩品第四 文殊師利問疾品第五
不思議品第六 觀衆生品第七
佛道品第八 入不二法門品第九

香積佛品第十 菩薩行品第十一

見阿閼佛品第十二 法供養品第十三
囑累品第十四

香積佛品第十

於是舍利弗心念日時欲至此諸菩薩當於何食時維摩詰知其意而語言佛說八解脫仁者受行豈雜欲食而聞法乎若欲食者且待須臾當令汝得未曾有食時維摩詰即入

三昧以神通力示諸大眾上方界分過四十二恒河沙佛土有國名衆香佛號香積今現在其國香氣比於十方諸佛世界人天之香最爲第一彼土無有聲聞辟支佛名唯有清淨大菩薩衆佛爲說法其界一切皆以香作

樓閣經行香地苑園皆香其食香氣周流十方無量世界時香積佛與諸菩薩方共坐食有天子號香嚴發阿耨多羅三藐三菩提心供養香積佛及諸菩薩此諸大眾莫不目見時維摩詰問衆菩薩諸仁者誰能致彼佛飯

以文殊師利威神力故咸皆默然維摩詰言
仁此大衆無乃可恥文殊師利曰如佛所言
勿輕未學於是維摩詰不起于座居衆會前
化作菩薩相好光明威德殊勝蔽於衆會而
告之曰汝往上方界分度如四十二恒河沙

佛土有國名衆香佛號香積與諸菩薩方共
坐食汝往到彼如我詞曰維摩詰稽首世尊
足下致敬無量問訊起居少病少惱氣力安
不願得世尊所食之餘當於娑婆世界施作
佛事令此樂小法者得弘大道亦使如來名

聲普聞時化菩薩唯諾承命即於會前昇于
上方到衆香界禮彼佛足白言維摩詰稽首
世尊足下致敬無量問訊起居少病少惱氣
力安不願得世尊所食之餘欲於娑婆世界
施作佛事使此樂小法者得弘大道亦使如

來名聲普聞彼諸大士見化菩薩歎未曾有
今此上人從何所來娑婆世界爲在何許云
何名爲樂小法者即以問佛佛告之曰下方
度如四十二恒河沙佛土有世界名娑婆佛
號如來正覺釋迦牟尼今現在於五濁惡世

爲樂小法衆生敷演道教彼有菩薩名維摩
詰住不可思議解脫爲諸菩薩說法故遣化
來稱揚我名并讚此土令彼菩薩增益功德
彼菩薩言其人何如乃作是化德力無畏神
足若斯佛言甚大一切十方佛土皆遣化往

施作佛事饒益衆生於是香積如來以衆香
鉢盛滿香飯與化菩薩時彼九百萬菩薩俱
發聲言我欲詣娑婆世界供養釋迦牟尼佛
并欲見維摩詰等諸菩薩衆佛言可往攝汝
身香無令彼諸衆生起惑著心又當捨汝本

形勿使彼國求菩薩者而自鄙恥又汝於彼
莫懷輕賤而作礙想所以者何十方國土皆
如虛空又諸佛爲欲化諸樂小法者不盡現
其清淨土耳時化菩薩既受鉢飯與彼九百
萬菩薩俱承佛威神及維摩詰力於彼世界

忽然不現須臾之間至維摩詰舍時維摩詰
即化作九百萬師子之座嚴好如前諸菩薩
皆坐其上是化菩薩以滿鉢香飯與維摩詰
飯香普熏毗耶離城及三千大千世界時毗
耶離婆羅門居士等聞是香氣身意快然歎

未曾有於是長者主月蓋從八萬四千人來
入維摩詰舍見其室中菩薩甚多諸師子座
高廣嚴好皆大歡喜禮衆菩薩及大弟子却
住一面諸地神虛空神及欲色界諸天聞此
香氣亦皆來入維摩詰舍時維摩詰語舍利

弗等諸大聲聞仁者可食如來甘露味飯大悲所勳無以限意食之使不消也有異聲聞念是飯少而此大衆人人當食化菩薩曰勿以聲聞小德小智稱量如來無量福慧四海有竭此飯無盡使一切人食搏若須彌乃至

一劫猶不能盡所以者何無盡戒定智慧解脫解脫知見功德具足者所食之餘終不可盡於是鉢飯悉飽衆會猶故不餽其諸菩薩聲聞天人食此飯者身安快樂譬如一切樂莊嚴國諸菩薩也又諸毛孔皆出妙香亦如

衆香國土諸樹之香爾時維摩詰故爲不知問衆香菩薩香積如來以何說法彼菩薩曰我土如來不以文字說法但以衆香令諸天人得入律行菩薩各各坐香樹下聞斯妙香即獲一切德藏三昧得是三昧者菩薩所有

功德皆悉具足彼諸菩薩問維摩詰今世尊
釋迦牟尼以何說法維摩詰言此土衆生剛
強難化故佛爲說剛強之語以調伏之言是
地獄是畜生是餓鬼是諸難處是愚人生處
是身邪行是身邪行報是口邪行是口邪行

報是意邪行是意邪行報是殺生是殺生報
是不與取是不與取報是邪淫是邪淫報是
妄語是妄語報是兩舌是兩舌報是惡口是
惡口報是無義語是無義語報是貪嫉是貪
嫉報是瞋惱是瞋惱報是邪見是邪見報是

慳悋是慳悋報是毀戒是毀戒報是瞋恚是
瞋恚報是懈怠是懈怠報是亂意是亂意報
是愚癡是愚癡報是結戒是持戒是犯戒是
應作是不應作是應知是應斷是障礙是不
障礙是得罪是離罪是淨是垢是有漏是無

漏是邪道是正道是有爲是無爲是世間是
涅槃以難化之人心如猿猴故以若干種法
制御其心乃可調伏譬如象馬龍候不調加
諸楚毒乃至徹骨然後調伏如是剛強難化
衆生故以一切苦切之言乃可大律彼諸菩

薩聞說是已皆曰未曾有也如世尊釋迦牟
尼佛隱其無量自在之力乃以貧所樂法度
脫衆生斯諸菩薩亦能勞謙以無量大悲生
是佛土維摩詰言此土菩薩於諸衆生大悲
堅固誠如所言然其一世饒益衆生多於香

積百千劫行所以者何此娑婆世界有十事
善法諸餘淨土之所無有何等爲十以布施
攝貧窮以淨戒攝毀禁以忍辱攝瞋恚以精
進攝懈怠以禪定攝亂意以智慧攝愚癡說
除難法度八難者以大乘法度樂小乘者以

諸善根濟無德者常以四攝成就衆生是爲
十彼菩薩曰菩薩成就幾法於此世界行無
瘡疣生于淨土維摩詰言菩薩成就八法於
此世界行無瘡疣生于淨土何等爲八饒益
衆生而不望報代一切衆生受諸苦惱所作

功德盡以施之等心衆生謙下無礙於諸菩
薩視之如佛所未聞經聞之不疑不與聲聞
而相違背不嫉彼供不高己利而於其中調
伏其心常省己過不訟彼短恒以一心求諸
功德是爲八法維摩詰文殊師利於大衆中

說是法時百千天人皆發阿耨多羅三藐三
菩提心十千菩薩得無生法忍

菩薩行品第十一

是時佛說法於菴羅樹園其地忽然廣博嚴
事一切衆會皆作金色阿難白佛言世尊以

何因緣有此瑞應是處忽然廣博嚴事一切
衆會皆作金色佛告阿難是維摩詰文殊師
利與諸大衆恭敬圍遶發意欲來故先爲此
瑞應於是維摩詰語文殊師利此諸菩薩皆
欲見佛至心禮事供養可共前往文殊師利

言善哉行矣今正是時維摩詰即以神力持
諸大衆并師子座置於右掌徃詣佛所到已
著地稽首佛足右遶七匝一心合掌在一面
立衆香世界諸菩薩即皆避座稽首佛足亦
遶七匝於一面立此土諸菩薩亦皆避座稽

首佛足右遶七匝於一面立諸大弟子釋梵
四天王等亦皆避座稽首佛足在一面立於
是世尊如法慰問諸菩薩已各令復坐即皆
受教衆坐已定佛語舍利弗汝見菩薩大士
自在神力之所爲乎唯然已見汝意云何世

尊我覩其爲不可思議非意所圖非度所測
爾時阿難白佛言世尊今所聞香自昔未有
是爲何香佛告阿難是彼菩薩毛孔之香於
是舍利弗語阿難言我等毛孔亦出是香阿
難言此所從來曰是長者維摩詰從衆香國

取佛餘飯於舍食者一切毛孔皆香若此阿
難問維摩詰是香氣住當久如維摩詰言至
此飯消曰此飯久如當消曰此飯勢力至於
七七日然後乃消又阿難若聲聞人未入正
位食此飯者得入正位然後乃消已入正位

食此飯者得心解脫然後乃消若未發大乘
意食此飯者至發意乃消已發意食此飯者
得無生忍然後乃消已得無生忍食此飯者
至一生補處然後乃消譬如有藥名曰上味
其有服者身諸毒滅然後乃消此飯如是滅

除一切諸煩惱毒然後乃消阿難白佛言未曾有也世尊如此香飯能作佛事佛言如是如是阿難或有佛土以佛光明而作佛事有以諸菩薩而作佛事有以佛所化人而作佛事有以菩提樹而作佛事有以佛衣服卧具

而作佛事有以飯食而作佛事有以園林臺觀而作佛事有以三十二相八十隨形好而作佛事有以佛身而作佛事有以虛空而作佛事衆生應以此緣得入律行有以夢幻影響鏡中像水中月熱時焰如是等喻而作佛

事有以音聲語言文字而作佛事或有清淨佛土寂寞無言無說無示無識無作無爲而作佛事如是阿難諸佛威儀進止諸所施爲無非佛事阿難有此四魔八萬四千諸煩惱門而諸衆生爲之疲勞諸佛即以此法而作

佛事是名入一切諸佛法門菩薩入此門者
若見一切淨好佛土不以爲喜不貪不高若
見一切不淨佛土不以爲憂不礙不沒即於
諸佛生清淨心歡喜恭敬亦無有也諸佛如
來功德平等爲教化衆生故而現佛土不同

阿難汝見諸佛國土地有若干而虛空無若
干也如是見諸佛色身有若干耳其無礙慧
無若干也阿難諸佛色身威相種性戒定智
慧解脫解脫知見力無所畏不共之法大慈
大悲威儀所行及其壽命說法教化成就衆

生淨佛國土具諸佛法悉皆同等是故名爲
三藐三佛陀名爲多陀阿伽度名爲佛陀阿
難若我廣說此三句義汝以劫壽不能盡受
正使三千大千世界滿中衆生皆如阿難多
聞第一得念總持此諸人等以劫之壽亦不

能受如是阿難諸佛阿耨多羅三藐三菩提
無有限量智慧辯才不可思議阿難白佛言
我從今已往不敢自謂以爲多聞佛告阿難
勿起退意所以者何我說汝於聲聞中爲最
多聞非謂菩薩且止阿難不特汝也其有智

者不應限度諸菩薩也一切海淵尚可測量
菩薩禪定智慧總持辯才一切功德不可量
也阿難汝等捨置菩薩所行是維摩詰一時
所現神通之力一切聲聞辟支佛於百千劫
盡力變化所不能作爾時衆香世界菩薩來

者合掌白佛言世尊我等初見此土生下劣
想今自悔責捨離是心所以者何諸佛方便
不可思議爲度衆生故隨其所應現佛國異
唯然世尊願賜少法還於彼土當念如來佛
告諸菩薩有盡無盡解脫法門汝等當學何

謂爲盡謂有爲法何謂無盡謂無爲法如菩薩者不盡有爲不住無爲何謂不盡有爲謂不離大慈不捨大悲深發一切智心而不忽忘教化衆生終不厭倦於四攝法常念順行護持正法不惜身命種諸善根無有疲厭志

常安住方便迴向求法不懈說法無恪勤供諸佛故入生死而無所畏於諸榮辱心無憂喜不輕未學敬學如佛墮煩惱者令發正念於遠離樂不以爲貴不著己樂慶於彼樂在諸禪定如地獄想於生死中如園觀想見來

求者爲善師想捨諸所有具一切智想見毀戒人起救護想諸波羅蜜爲父母想道品之法爲眷屬想發行善根無有齊限以諸淨國嚴飾之事成己佛土行無限施具足相好除一切惡淨身口意生死無數劫意而有勇聞

佛無量德志而不倦以智慧劔破煩惱賊出
陰界入荷負衆生永使解脫以大精進摧伏
魔軍常求無慢實相智慧行少欲知足而不
捨世法能令衆生如意而不擾累不壞威儀
而能隨俗起神通慧引導衆生得念總持所

聞不忘善別諸根斷衆生疑以樂說辯演法
無礙淨十善道受天人福修四無量開梵天
道勸請說法隨喜讚善得佛音聲身口意善
得佛無礙威儀深修善法所行轉勝以大乘
教成菩薩僧心無放逸不失衆善行如此法

是名菩薩不盡有爲何謂菩薩不住無爲謂
修學空不以空爲證修學無相無作不以無
相無作爲證修學無起不以無起爲證觀於
無常而不厭善本觀世間苦而不惡生死觀
於無我而誨人不倦觀於寂滅而不永寂滅

觀於遠離而身心修善觀無所歸而歸趣善
法觀於無生而以生法荷負一切觀於無漏
而不斷諸漏觀無所行而以行法教化衆生
觀於空性而不捨大悲觀無生法而不隨小
乘觀諸法虛妄無心無主無依本願未滿而

福德不虛智慧不妄行願普濟直覺自在佛
性常住修如此法是名菩薩不住無爲又具
福德故不住無爲具智慧故不盡有爲具大
慈悲不住無爲起大悲故不盡有爲度衆生
故不住無爲敬佛法故不盡有爲得相好故

不住無爲一切智故不盡有爲行方便故不
住無爲達觀智故不盡有爲淨佛土故不住
無爲佛攝授故不盡有爲濟衆生故不住無
爲示諸法故不盡有爲積善跟故不住無爲
修福種故不盡有爲滿本願故不住無爲本

無願故不盡有爲心清淨故不住無爲心僥
益故不盡有爲遊戲通故不住無爲成佛慧
故不盡有爲到彼岸故不住無爲未寂滅故
不盡有爲積善財故不住無爲依了義故不
盡有爲集法藥故不住無爲隨授藥故不盡

有爲心不退故不住無爲願未滿故不盡有
爲修法本故不住無爲度小乘故不盡有爲
除煩惱苦故不住無爲滅衆生病故不盡有
爲諸正士菩薩修如此法不盡有爲不住無
爲是名盡無盡解脫法門汝等當學爾時彼

諸菩薩聞說是法皆大歡喜以衆妙華若干
種色若干種香散遍三千大千世界供養於
佛及此經法并諸菩薩已稽首佛足歎未曾
有言釋迦牟尼佛乃能於此善行方便言已
忽然不現還到彼國

見阿閼佛品第十二

爾時世尊問維摩詰汝欲見如來爲以何等
觀如來乎維摩詰言如自觀身實相觀佛亦
然我觀如來前際不來後際不去今則不住
不觀色不觀色如不觀色性不觀受不觀受

如不觀受性不觀想不觀想如不觀想性不
觀行不觀行如不觀行性不觀識不觀識如
不觀識性非四大住同於虛空六入無積眼
觸耳觸鼻觸舌觸身觸意觸已過不在三界
三垢已離順三脫門具足三明無得而得於

一切法第一無著無真如界深入真如無相
續見因本無生緣無交涉不一相不異相不
自相不他相非無相非取相不此岸不彼岸
不中流觀於寂滅亦不永滅不此不彼不以
此不以彼不可以智知不可以識識無晦無

明無名無相無強無弱非淨非穢不在方不
離方非有爲非無爲無示無說不施不慳不
戒不犯不忍不恚不進不怠不定不亂不智
不愚不誠不欺不來不去不出不入一切言
語道斷非福田非不福田非應供養非不應

供養非取非捨非有相非無相同真際等法
性不可稱不可量過諸稱量非大非小非見
非聞非覺非知離衆結縛等諸智同衆生於
諸法無分別一切無得無失無濁無惱無作
無起無生無滅無畏無憂無喜無厭無已有

無當有無今有不可以一切言說分別顯示
世尊如來身爲若此作如是觀以斯觀者名
爲正觀若他觀者名爲邪觀爾時舍利弗白
佛言此長者維摩詰於何没而未生此佛告
舍利弗汝可問維摩詰舍利弗即問維摩詰

汝於何没而來生此維摩詰言尊者汝所得法有没生乎舍利弗言無没生也若諸法無没生相云何問言汝於何没而來生此於意云何譬如幻師幻作男女寧没生耶舍利弗言無没生也汝豈不聞佛說諸法如幻相乎

答曰如是若一切法如幻相者云何問言汝於何没而來生此舍利弗没者爲虛誑法壞敗之相生者爲虛誑法相續之相菩薩雖没不盡善本雖生不長諸惡是時佛告舍利弗有國名妙喜佛號無動是維摩詰於彼國没

而來生此舍利弗言未曾有也世尊是人乃能捨清淨土而來樂此多怒害處維摩詰語舍利弗於意云何日光出時與冥合乎答曰不也日光出時即無衆冥維摩詰言夫日何故行闇浮提答曰欲以明照爲之除冥維摩

詰言菩薩如是雖生不淨佛土爲化衆生不與愚闇而共合也但滅衆生煩惱闇耳是時大衆渴仰欲見妙喜世界無動如來及其菩薩聲聞之衆佛知一切衆會所念告維摩詰言善男子爲此衆會現妙喜國無動如來及

諸菩薩聲聞之衆衆皆欲見於是維摩詰心念吾當不起于座接妙喜國鐵圍山川溪谷江河大海泉源須彌諸山及日月星宿天龍鬼神梵天等宮并諸菩薩聲聞之衆城邑聚落男女大小乃至無動如來及菩提樹諸妙

蓮華能於十方作佛事者三道寶階從閻浮提至忉利天以此寶階諸天來下悉爲禮敬無動如來聽受經法閻浮提人亦登其階上昇忉利見彼諸天妙喜世界成就如是無量功德上至阿迦尼吒天下至水際以右手斷

取如陶家輪入此世界猶持華鬘示一切衆
作是念已入如是三昧現神通力以其右手
斷取妙喜世界置於此土彼得神通菩薩及
聲聞衆并餘天人俱發聲言唯然世尊誰取
我去願見救護無動佛言非我所爲是維摩

詰神力所作其餘未得神通者不覺不知己
之所往妙喜世界雖入此土而不增減於是
世界亦不迫隘如本無異爾時釋迦牟尼佛
告諸大衆汝等且觀妙喜世界無動如來其
國嚴飾菩薩行淨弟子清白皆曰唯然已見

佛言若菩薩欲得如是清淨佛土當學無動
如來所行之道現此妙喜國時娑婆世界十
四那由他人發阿耨多羅三藐三菩提心皆
願生於妙喜佛土釋迦牟尼佛即記之曰當
生彼國時妙喜世界於此國土所應饒益其

事訖已維摩詰仍以右手送歸本處舉衆皆見佛告舍利弗汝見此妙喜世界及無動佛不唯然已見世尊願使一切衆生得清淨土如無動佛獲神通力如維摩詰世尊我等快得善利得見是仁親近供養其諸衆生若今

現在若佛滅後聞此經者亦得善利況復聞已信解受持讀誦解說如法修行若有手得是經典者便爲已得法寶之藏若有讀誦解釋其義如說修行即爲諸佛之所哀愍護念其有供養如是人者當知即爲供養於佛其

有書持此經卷者當知其室即有如來若聞是經能隨喜者斯人即爲取一切智若能信解此經乃至一四句偈爲他說者當知此人即是大法施主若能恭敬瞻仰信解諦觀此經是人即爲受阿耨多羅三藐三菩提記者

法供養品第十三

爾時釋提桓因於大眾中白佛言世尊我雖從佛及文殊師利聞百千經未曾聞此不可思議自在神通決定實相經典如我解佛所說義趣若有衆生聞是經法信解受持讀誦

之者必得是法不疑何況如說修行斯人即爲閉衆惡趣開諸善門常爲諸佛之所護念降伏外學摧滅魔怨修治菩提安處道場履踐如來所行之跡世尊若有受持讀誦如說修行者我當與諸眷屬供養給事所在聚落

城邑山林曠野有是經處我亦與諸眷屬聽受法故共到其所其未信者當令生信其已信者當爲作護佛言善哉善哉天帝如汝所說吾助爾喜此經廣說過去未來現在諸佛不可思議阿耨多羅三藐三菩提是故天帝

若善男子善女人受持讀誦供養是經者即
爲供養去來今佛天帝正使三千大千世界
如來滿中譬如甘蔗竹葦芝蔴紫降叢林若
有善男子善女人或以一劫或以數劫恭敬
尊重讚歎供養奉諸所安至諸佛滅後以一

一全身舍利起七寶塔縱廣一四天下高至
梵天表剎莊嚴以一切華香瓔珞幢幡妓樂
微妙第一若一劫若數劫而供養之天帝於
意云何其人植福寧爲多不釋提桓因言甚
多世尊彼之福德若以百千億劫說不能盡

佛告天帝當知是善男子善女人聞是不可
思議解脫經典信解受持讀誦修行福多於
彼所以者何諸佛菩提皆從法生以法供養
乃能合菩提相若以世間財寶供養欲於菩
提相合無有是處佛告天帝過法無量阿僧

祇劫時世有佛號曰藥王如來應供正遍知
明行足善逝世間解無上士調御丈夫天人
師佛世尊世界名大莊嚴劫曰莊嚴佛壽二
十小劫其聲聞僧三十六億那由他菩薩僧
有十二億天帝是時有轉輪聖王名曰寶蓋

七寶具足主四天下王有千子端正勇健能
伏怨敵爾時寶蓋與其眷屬供養藥王如來
施諸所安至滿五劫過五劫已告其千子汝
等亦當如我以深心供養於佛於是千子受
父王命供養藥王如來服滿五劫一切施安

其王一子名曰月蓋獨坐思維寧有供養殊
過此者以佛神力空中有天曰善男子法之
供養勝諸供養即問何謂法之供養天曰汝
可往問藥王如來當廣爲汝說法之供養即
時月蓋王子行詣藥王如來稽首佛足却住

一而白佛言世尊諸供養中法供養勝云何
名為法之供養佛言善男子法供養者諸佛
所說深經一切世間難信難受微妙難見清
淨無染非但分別思惟之所能得菩薩法藏
所攝陀羅尼印印之至不退轉法輪成就六

度善分別義順菩提法衆經之上入大慈悲
離衆魔事及諸邪見順因緣法無我無人無
衆生無壽命空無相無作無起能令衆生坐
於道場而轉法輪諸天龍神藥叉阿修羅迦
樓羅緊那羅摩睺羅伽乾闥婆等所共歎譽

能令衆生入佛法藏攝諸賢聖一切智慧說
衆菩薩所行之道依於諸法實相之義明宣
無常苦空無我寂滅之法能救一切慳吝毀
禁瞋恚懈怠散亂惡見衆生諸魔外道及貪
著者能使怖畏諸佛賢聖所共稱歎背生死

苦示涅槃樂十方三世諸佛所說若聞如是
等經信解受持讀誦以方便力爲諸衆生分
別解說顯示分明守護法故是名法之供養
又於諸法如說修行隨順十二因緣離諸邪
見得無生忍決定無我無有衆生而於因緣

果報無違無諍離諸我所依於義不依語依
於智不依識依了義經不依不了義經依於
法不依人隨順法相無所入無所歸無明畢
竟滅故諸行亦畢竟滅乃至生畢竟滅故老
死亦畢竟滅作如是觀十二因緣無有盡相

不復起見是名最上法之供養佛告天帝王
子月蓋從藥王佛聞如是法得柔順忍即解
寶衣嚴身之具以供養佛白佛言世尊如來
滅後我當行法供養守護正法願以威神加
哀建立令我得降伏魔怨修菩薩行佛知其

深心所念而記之曰汝於末後守護法城天帝時王子月蓋見法清淨聞佛授記以信出家修習善法精進不久得五神通具菩薩道得陀羅尼無斷辯才於佛滅後以其所得神通總持辯才之力滿十小劫藥王如來所轉

法輪隨而分布月蓋比丘以守護法勤行精進即於此身化百萬億人於阿耨多羅三藐三菩提立不退轉十四那由他人深發聲聞辟支佛心無量衆生得生天上天帝時王寶蓋豈異人乎今現得佛號寶焰如來其王千

子即賢劫中千佛是也過去迦羅鳩孫馱等四佛餘者相繼而出最後如來號曰樓至月蓋比丘則我身是如是天帝當至此要以法供養於諸供養爲上爲最第一無比是故天帝當以法之供養供養於佛以法恭敬供養

於諸恭敬供養爲上爲最第一無比

囑累品第十四

於是佛告彌勒菩薩言彌勒我今以是無量
億阿僧祇劫所集阿耨多羅三藐三菩提法
付囑於汝如是輩經於佛滅後末世之中汝

等當以神力廣宣流布於閻浮提無令斷絕
所以者何未來世中當有善男子善女人及
天龍鬼神乾闥婆羅刹等發阿耨多羅三藐
三菩提心樂于大法若使不聞如是等經則
失善利如此輩人聞是等經必多信樂發希

有心當以頂受隨諸衆生所應得利而爲廣
說彌勒當知菩薩有二相何謂爲二一者好
於雜句文飾之事二者不畏深義如實能入
若好雜句文飾事者當知是爲新學菩薩若
於如是無染無著甚深經典無有恐懼能入

其中聞已心淨受持讀誦如說修行當知是爲久修道行彌勒復有二法名新學者不能決定於甚深法何等爲二一者所未聞深經聞之驚怖生疑不能隨順毀謗不信而作是言我初不聞從何所來二者若有護持解說

如是深經者不肯親近供養恭敬或時於中說其過惡有此二法當知是新學菩薩爲自毀傷不能於深法中調伏其心彌勒復有二法菩薩雖信解深法猶自毀傷而不能得無生法忍何等爲二一者輕慢新學菩薩而不

教誨二者雖信解深法而取相分別是爲二法彌勒菩薩聞說是已白佛言世尊未曾有也如佛所說我當遠離如斯之惡奉持如來無數阿僧祇劫所集阿耨多羅三藐三菩提法若未來世善男子善女人求大乘者當令

手得如是等經與其念力使受持讀誦爲他
廣說世尊若後末世有能受持讀誦爲他說
者當知是彌勒神力之所建立佛言善哉善
哉彌勒如汝所說佛助爾喜於是一切菩薩
合掌白佛我等亦於如來滅後十方國土廣

宣流布阿耨多羅三藐三菩提法復當開導
諸說法者令得是經爾時四天王白佛言世
尊在在處處城邑聚落山林曠野有是經卷
讀誦解說者我當率諸官屬爲聽法故徃詣
其所擁護其人百由旬令無伺求得其便

者是時佛告阿難受持是經廣宣流布阿難
言唯然我已受持要者世尊當何名斯經言
阿難是經名爲維摩詰所說亦名不可思議
解脫法門如是受持佛說是經已長者維摩
詰文殊師利舍利弗阿難等及諸天人阿修
羅一切大衆聞佛所說皆大歡喜信受奉行
維摩詰所說大乘經卷下（終）